

**Uunga siunnersuut: Atuarfik pillugu Inatsisartut inatsisaata allanngortinneqarnera
pillugu Inatsisartut inatsisaat**

(Atuartitsinerup imaa, aaqqissugaanera, piareersarneqarnera, atuartut amerlassusaat, ikiuinermi atassuteqarfissaq aamma atuarfimmik aqutsisutut ilinniartitaaneq pillugu malittarisassat allanngortinneri)

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

Siunnersuutip aappasaanneerreqarnerani

ISUMALIUTISSIISUTAA

Ataatsimiititaliap suliaqarnermi makkuninnga inuttaqarpoq:

Inatsisartunut ilaasortaq Sofia Geisler, Inuit Ataqatigiit, siulittaasoq

Inatsisartunut ilaasortaq Doris Jakobsen Jensen, Siumut, siulittaasup tullia

Inatsisartunut ilaasortaq Mariia Simonsen, Inuit Ataqatigiit

Inatsisartunut ilaasortaq Nivi Olsen, Demokraatit

Inatsisartunut ilaasortaq Mette Arqe-Hammeken, Naleraq

UKA2021-imi ulloq 5. oktober 2021 siunnersuutip siullermeerlugu oqallisigineqarnerata kingorna siunnersuut Ataatsimiititaliamit misissorneqarpoq.

1. Siunnersuutip imarisaa siunertaalu

Matuminnga siunnersuuteqarnermi atuarfik pillugu inatsisartut inatsisaata immikkoortunut arfinilinni allanngortinniarneqarpoq.

Allannguutit tassaapput atuartut amerlassusaasa amerlanerpaaffiata ikilisinneqarnissaa pillugu malittarisassanik aalajangersaanissamut piginnaatitsissummik aalajangersaaneq, atuartitsissummi inuiaqatigiilerinermi atuartitsissummik oqaluttuarisaanermik immikkoortitsilerneq, taamaaliornikkut aggusti 2023-miit oqaluttuarisaanermik immikkut atuartitsissuteqalernissaq kiisalu atuartitsissummi sumiiffinni toqqagassanik nalimmassaanissaq, nalimmassaanissarlu tassaassalluni ikinnerusunik tigussaanagerusunilli mernguernatulerinermi pingaartitsinissaq.

Taakku saniatigut siunnersuutigineqarpoq teknologiimik paasinninnermik ersarissaaneq, taamaalilluni IT, digitalikkut perorsarsimaneq pissusilersornerlu atuartitsissutigineqartuni pissusissamisoortumik ilanngunneqartassalluni. Ilanngullugu atuarfinni isumaginninnermik attaveqarnissamik aaqqissuussinissamik inatsisitigut tunngaviliinissaq soorlu aamma atuarfinni

pisortaasunik aqutsinissamik ilinniagaqarnissamut piumasaqaatinik aalajangersaasoqassasoq Naalackersuisut siunnersuutigigaat.

2. Tusarniaanermi akissutit

Inatsisartut siulittaasoqarfiata maleruagassai naapertorlugit tusarniaanermut akissutaasut inatsisissatut siunnersuummut kakkiupput.

3. Apeqquteqaatit

Immikkoortumik suliaqarnermut atatillugu Ilinniartitaanermut, Kultureqarnermut, Timersornermut Ilageeqarnermullu Naalackersuisoq ataatsimiititaliamit apeqqutit arlallit akeqqullugit qinnuigineqarpoq. Ataatsimiititaliap apeqqutaasa akissuteqaatillu tassunga atasut assilineri isumaliutissiisummut uunga ilanngussatut kakkiunneqarput. Akissuteqaatit pisariaqartinneqarnerat tunngavigalugu ataatsimiititaliap siunnersuummik suliaqarneranut ilanngunneqarumaarput.

4. Siunnersuummik ataatsimiititaliap suliarinninera

Siunnersuutigineqartumi uani Inatsisartuni ukiuni kingullerni oqaluuserineqarsimasunik inatsisitigut tunngaviliineq qulakkeerneqassasoq ataatsimiititaliamit maluginiarneqarpoq. Immikkoortumi uuminnga suliaqarnermi siunnersuutip immikkoortui ataasiakkaat tulleriarlugit sammineqassapput.

4.1 Atuartut amerlassusaat

Siunnersuummi uani atuartut atugarissaarnerat atuarnerminnilu atugarisaat aalajangiisuutillugit atuaqatigiinni amerlassutsinik ikinnerulersitsisinnaaneq pillugu Naalackersuisut malittarisassiorsinnaanerannik periarfissiisaaq.

Atuarfik pillugu Inatsisartut inatsisaanni maannakkut atuuttumi taamaallaat allaqqavoq atuaqatigiinni 26-nik amerlanerusoqassanngitsoq. Taamaattumik siunnersuutip Naalackersuisut Nalunaarusiorsinnaanerani inatsisitigut tunngavilissavai.

Aalajangersakkat nutaat eqqarsaatigalugit ataatsimiititaliap paasivaa pineqartut tassaasut periarfissamik ammaassisut. Taamaaliornikkut Naalackersuisut pisussaaffilerneqanngillat Nalunaarusiornissamik, tamannali aatsaat pissalluni Naalackersuisunit pisariaqalernerinik naliliisoqarneratigut.

Ataatsimiititaliamit apeqqutigineqartunut Naalackersuisut akissutaat tunngavigalugu atuaqatigiit amerlassusaat pillugu aalajangersagaq naapertorlugu Nalunaarusiornissamik periarfissaq manna tikillugu piffissaliisoqarsimanngitsoq ataatsimiititaliap maluginiarpa.

Ataatsimiititaliap apeqqutaanut akissuteqaammi Naalackersuisut nassuiaapput atuaqatigiinni ikilisinneqartariaqarneranut piumasaqaataasunik patsisaasinnaasunik nalilersuisoqartariaqartoq, taakkulu kommunimik allanillu soqutigisaqatigiinnik ingerlaavartumik ataatsimiinnertigut oqaloqatigiittarnertigut, ataatsimeersuarnerni, siunnersorneqarnermi assigisaanilu ingerlatsinertigut pisinnaasut. Naalackersuisut apeqquteqaammut akissutigisaminni allaaserisaqarput attuumassuteqartut pisariaqartitsisoqarnerani ilisimatitsissanersut imaluunniit atuaqatigiinni atuartut

ikilisinneqarnissaanut tunngaviussat pillugit Naalackersuisut nammineq aalajangissanersut:

“Tunngaviussaaq apeqqummi pineqartut ersarinnerusumik suussusilerlugit gulaarneqarsimani, allaffissornikkut aalajangersakkanik malittarisassiornermi, tamannalu naatsorsuutigineqarpoq kommunit qanimut isumasiortarlugit pisartussatut, soorlutaaq ataatsimut isigaluni tamanna aallaaviusooq qularnaarumallugit ataqatigiissaagaasunik sunniuteqarluartussanillu meeqqat atuarfiannut atatillugu unammilligassanik isiginnineq.”

(Ataatsimiititaliap ersarissaanera)

Ataatsimiititaliap akissut iluarisimaarpaa.

Klasseni atuaqatigiinnik ikilisitsinerup atuarfinni ataasiakkaani amerlanerusunik ilinniartitsisunik atorfinitsitsiariaqalersinnaanera ataatsimiititaliamit eqqumaffigineqarpoq. Klasseni atuaqatigiinnik ikisilissitsinerup kingunerisaanik klassenik pilersitsisoqarneranut aningaasanik malitseqartitsisoqarnissaanut ataatsimiititaliap apeqqutaanut Naalackersuisooq akissuteqarpoq:

“...taamaattoqassapat nalinginnaasumik ilaatinneqassasoq pissusissamisoortumik kommuninik isumaqatigiinniarnerni, allaffissornikkut malittarisassanik aqutsinermut atatillugu.”

Naalackersuisut kommuninik suleqateqarlutik Namminersorlutik Oqartussanut atuarfinnullu naammaginantumik meeqqallu atugarisaanik atuarnerannullu pisinnaatitaanerannik ajornerulersitsinngitsumik angusaqarnissaat ataatsimiititaliap tatigaa.

4.2 Oqaluttuarisaanerup immikkut ilinniakkatut immikkoortinnissaa

Inatsimmi kapitalip sisamaani atuarnerup imarisaata, aaqqissugaanera piareersarneqarnerani allangortinneqarneranik siunnersuut imaqartoq ataatsimiititaliap maluginiarpaa. Allangortitsinerup kingunerissava atuartitsissutip kulturip inuiaqatigiilerinerullu iluani oqaluttuarisaaneq immikkut ilinniakkatut inissisimalernera. Inatsimmi atuuttumi oqaluttuarisaanermik atuartitsineq ilinniakkamut inuiaqatigiilerinermut ilaavoq, taamaattumillu ilinniakkatut immikkoortutut inissisimanani. Aalajangersagaq ataatsimiititaliamit iluarisimaarneqarpoq, ukiunimi kingullerni arlalinni atuartut Kalaallit Nunaata oqaluttuarisaaneraniq ilisimasaqarnerat isornartorsiorneqartarmat.

Oqaluttuarisaanerup atuarfimmi ilinniakkatut immikkoortumik pilersitsiniarluni suliaqarnermut atatillugu ataatsimiititaliap Naalackersuisunut atuartitsissutip kulturi inuiaqatigiilerinerlu tulleriarinermi pingaaruteqarnera mianersuutigeqquaa, tassami aalajangersakkap inuiaqatigiilerinermut, upperisarsiornermut eqqarsaqqissaarnermullu atuartitsinerit ikilisinneqarnissaannik kinguneqarnissaa naatsorsuutigineqarmat.

Aalajangersakkap aatsaat august 2023-mi atuuttunngortinneqarnissaa ataatsimiititaliap maluginiarpaa. Tamanna tunngaveqarpoq atuarfimmi atuartitsissutini atuartitsissutinilu

qanitariissuni alloriarfiit siunertaat kiisalu atuartsissutit siunertaat ilikkagassatullu anguniagassat pillugit nalunaarummik aamma atuarfimmi naliliisarneq uppersaasiortarnerlu pillugit nalunaarummi allannguissamik pisariaqartitsisoqarmat. Tamatuma saniatigut ilikkagassanik pilersaarutinik allannguissat atuartsissutinillu suliaqartoqarpoq. Ataatsimiititaliamut akissuteqaamminni Nalaakkersuisut ilisimatitsissutigaa:

”Ilinniartitaanermut Aqutsisoqarfiup aallartereerpaa atuartsissutissanut siunertanik ilikkagassanilu angusassanik ilinniartitsissutini suliaqarfinnilu tamani atuuttussanik suliaqarneq. Atuartsissutini siunertat ilikkagassanilu anguniakkat maanna atuartsissutini - fagini – inuiaqatigiilerinermilu, ullumikkut oqaluttuarisaanermik aamma ilaqartumi tunngaviussat, taamaaliornikkullu atuartsissutit fagit immikkoortiterneri ersarinnerulersillugit.”

Oqalutturisaanerup immikkut ilinniartitsisutigilernerata ilinniakkami misilitsittoqartarnissaanik kinguneqanngitsoq ataatsimiititaliap paasivaa. Taamaakkaluatorli oqalutturisaanerup immikkut ilinniakkatut atuarfimmi naggasiisumik nalilersuinermi nalunaarummut ilanngunneqarpat, tamassuma kingunerissavaa ilinniartitaanermut naalakkersuisoqarfiup aalajangersinnaagaa allattariarsornikkut misilitsittoqartarnissaa soorlu ilinniakkami oqalutturisaanermi.

Taamaattoq meeqqat atuarfianni inaarutaasumik nalilersuineq pillugu nalunaarummi oqalutturisaaneq (historie) ilanngunneqarneratigut ilaatigut oqalutturisaanermut (historie) allattariarsornikkut misilitsittoqartassanersoq Ilinniartitaanermut Naalakkersuisoqarfiup aalajangiisarnissaanik kinguneqartussaasoq ataatsimiititaliamit maluginiarneqarpoq.

Naggataatigut aalajangersakkami matumani meeqqat atuarfianni atuartunut tamanut atuutissamat ataatsimiititaliap nuannaarutigalugu malluginiarppaa.

4.3 Sumiiffinni toqqagassat

Meeqqat atuarfiini nalinginnaasumik nipilersornermik ilinniartitsinerup immikkut nukittorsarneqarnissaanik siunertaqarneq ataatsimiititaliamit nuannaarutigalugu isumaqarfigineqarpoq. I Danmarks Evalueringsinstituts (EVA) evalueringsrapport 2015-meersumi ima qulequtaqartumi ”Grønlands folkeskole” ilinniartitsissutini sumiiffinni toqqagassani ima allassimasoqarpoq:

Ilinniartitsissutini sumiiffinni toqqagassani, tassaasuni sulianik-nipilersornermik ilinniartitsissutit, eqqarsaataavoq sumiiffimmi inuit isumalluutit sumiiffinnilu kulturi atorpeqarsinnaassasut, taamaammallu siunnersuutigineqarpoq ilinniartitsissutini taakkunani ilinniagassanut pilersaarutit aalajangersimasut kommunalbestyrelsit akuerissagaat.

(Ataatsimiititaliap erseqqissaanera)

Siunnersuummi matumani oqaasertaliunneqartut aallaavigalugit soorlu aamma nalilersuinermi inernilunneqartumi taamaaliortoqarsimanngitsoq ataatsimiititaliamit maluginiarneqarpoq. Nalilersuinermut nalunaarusiami allassimavoq atuarfiit arlallit isumaqartut ilinniartitsissut

'sumiiffinni toqqagassat' tigussaangippallaartoq, ilinniartitsissusigineqartunilu 'sumiiffinni toqqagassat'-ni ilaatinneqartuni ilinniagassanik tunngatillugu suliaqarnermik pikkorissusermi ilaatigut annaasaqartoqartarmat ataatsimiititaliap uparuarpa. Ilanngullugu siunnersutip nassuiaataani allassimavoq kommunalbestyrelsit tamarmik ilinniartitsissutigisamut atuarnermut pilerisaarutini suliaqarsimanngitsut.

Inatsisit pissusuiviusut tunngavigalugit atuutsinneqarsinnaasariaqartut ataatsimiititaliaq ersarissumik isumaqarpoq. Taamaattumik sumiiffinni toqqagassat pillugit aalajangersakkanik allanngortitsineq ataatsimiititaliap pisariaqarsora. Ataatsimiititaliali Naalakkersuisut kaammattussavai aalajangersakkat ukiuni arlalinni atuutereernerisigut nalilersuisitsisoqassasooq taamaaliornikkut aalajangersakkat anguniagassatut aalajangiussanut nammassinnissinnaanissaat Naalakkersuisut qulakkeersinnaaniassammassuk.

Mernguertulerinermi atuarfimmi nikerarfinni tamani ilinniartitsissutigineqartut tamakkiisumik pinngitsuugassaangitsutut aalajangersaaffigineqarsimanngitsut ataatsimiititaliap maluginiarpaa. Paasiuminarsarniarlugu ataatsimiititaliaq takussutissamik suliaqarpoq.

Takussutissiaq 1: Atuartitsissutigisassat piunasaqaataasut, Akuleriisillugit ingerlatsinerit Qinigassatullu toqqarneqarsinnaasut trinikkaarlugit agguataarneri			
Trinit	Atuartitsissutigisassat piunasaqaataasut	Akuleriisillugit ingerlatsinerit:	Qinigassatut toqqarneqarsinnaasut
Nukarliit	- Timersorneq - Eqqumiitsuliorneq	Nipilersorneq aamma assassorneq ilusilersuinerlu	
Akulliit	- Eqqumiitsuliorneq - Timersorneq - <i>Assassorneq ilusilersuinerlu</i> - <i>Nipilersorneq</i> - illumi suliasanik ilinniarneq	<i>TAKUUK!</i> <i>Nipilersorneq,</i> <i>assassorneq</i> <i>ilusilersuinerlu</i> <i>(Atuartitsilluni</i> <i>pikkorissarnertut</i> <i>imaluunniit</i> <i>akuleriisillugit</i> <i>ingerlatsinertut)</i>	
Angajulliit	- Timersorneq - illumi suliasanik ilinniarneq		- Eqqumiitsuliorneq - Assassorneq ilusilersuinerlu - Nipilersorneq - Teknologiiimik paasisimasaqarneq - Sumiiffinni qinigassat

Takussutissiaq 1-ip nukarlernut sumiiffinni toqqagassatut ilinniartitsissutigisat timersorneq, eqqumiitsuliornerlu pinngitsuugassaangitsutut ilaapput. Killilimmik

pinngitsuugassaangitsunik ilinniartitsissutigisassanik amerlavallaartunik tassani nikeriarfimmi kissaateqartoqannginnera ataatsimiititaliap maluginiarpaa.

Akullernut malunnaatilimmik amerlanerusunik pinngitsuugassaangitsunik ilinniartitsissutigisassaqqarpoq. Angajullernut nukarlernisuulli ikinnerusunik ilinniartitsissutigisassaqqarpoq, ilinniartitsissutigineqartussanilli arlalinnik toqqagassaqqarlutik. Nikeriarfinni tamani ilinniartitsissutigisassani pinngitsuugassaangitsutut inissisimasutuaq tassaasoq timersorneq ataatsimiititaliap maluginiarpaa.

Siusinnerusukkurt agguataarineq isumatusaarnerusooq ataatsimiititaliaq isumaqqarpoq ilinniartitsissutigisamilu 'sumiiffinni toqqagassat' atuarfinni kommuninilu atuarfiit pillugit ajornartorsiutaasunik qaangeruminarnerusitsissasut ataatsimiititaliaq isumaqqarpoq.

Takussutissiaq 2: Mernguernartulerinermi atuartitsinerni atuartitsiffiusussat sammisassallu	
Mernguernartuleriffiit	
Atuartitsiffiusussat:	Sammisassat:
Illumi suliasanik ilinniarneq	
Nipilersorneq	Erinarsorneq
	Timersorneq
	Isiginnaartitsineq
Timersorneq	Aneerneq
Eqqumiitsuliorneq	Illuliortaaseq
Assassorneq ilusilersuinerlu	Sananeq
	Assassorneq

Takussutissiaq 2 malillugu ilinniartitsissutigisassat qanoq imaqqassanersut ersarinnerulersooq ataatsimiititaliaq isumaqqarpoq. Naalakkersuisut akissuteqatigisaminni toqqagassat ataasiakkaat ilinniakkamut tamakkiisumik naammassinnittutut isiginngikkaat, kisiannili ilinniartitsissutigisamut ilanngunneqartariaqartutut isigigaat ataatsimiititaliap maluginiarpaa.

4.4 Teknologimik paasisimasaqqarneq

Teknologimik paasisimasaqqarneq, digitalikkut perorsarsimaneq, digitalimilu pissusilersorneq atuarfik pillugu inatsimmi erseqqissarneqqarmat ataatsimiititaliap pitsaasutut nalilerpaa.

Ilinniartitsissutigisassat ilikkagassanut pilersaarutinut ilanngunneqqarnissaanik, taamaalilluni atuarfiit erseqqissumik atuartitsissutigisaminni malittarisassaqqarnissaat qaqugukkullu ilinniartitsinermi IT-mik ilanngussinissaminnut qularunnaarnissaannik Naalakkersuisup isumaginninniarnera ataatsimiititaliap aammattaq nuannaarutigivaa.

4.5 Inuit ikiuinermi atassuteqqarfimmik isumaginnittut

Tusarniaanermut Kommuneqqarfik Sermersuumit akissuteqaammi inissinneqqarpoq isumaginninnikkut attaveqqaatinik suliaqqartut atuarfinnik arlalinnik ataatsikkoortitsillutik sullissisinnasut ataatsimiititaliamit maluginiarneqqarpoq. Sulisunik piukkunnartunik sulisussarsiorneq ajornartorsiutitaqqarmat aaqqiissutitut pitsaasutut ataatsimiititaliap isumaqqarfigaa. Pitsaassutsikkut siammassissumik piumasaaqqateqqarnerup, inuit ikiuinermi

atassuteqarfimmi isumaginnittunik sulisussamik sulisussanilluunniit eqqortunik atuarfiit atorfinitsitsinnaalernerat isumannaannerulersinneqartoq ataatsimiititaliaq isumaqarpoq.

Ukiuni 2012-imiit 2015-imut suliniut "atuarfimmi kaammattuisoq" ingerlanneqarpoq. Suliniutinut aningaasanik inummillu ataatsimut tiimimusiaqarluni aningaasarsiaqartumik akissarsitinneqarnissaanut aningaasanik qinnuteqarnissamut atuarfiit pilersaarut aqcutigalugu piviusunnagortinneqarsinnaalerpoq. Naalakkersuisut naapertorlugit atuarfimmi kaammaatuisoqartarnera atuarfiit ilaanni inunnik isumaginnittumik atorfeqartitsilluni aaqqiinikkut taarserneqarsimasoq ataatsimiititaliaq paasivaa.

Inuit ikiuinermi atassuteqarfimmik isumaginnittut aamma atuarfimmi kaamaattuisumik aaqqissuusinerit assigiissuseqarnerat ataatsimiititaliap paasivaa, tassami siunertaasut tamakkiinerusoq isigalugu assigiimmik anguniagaqarput; meeqqat inuusutullu atuarneq tunngaviginngikkaluarlugu tapersorsorneqarnissaat isumassorneqarnissaallu qulakkeerniarneqarmat.

Inuit ikiuinermi atassuteqarfimmik isumaginnittut aamma atuarfimmi kaamaattuisumik aaqqissuusinerit assigiinnngissutaat pingaernerpaaq tassaavoq siunnersuutip uuma akuerineratigut atassuteqarfimmik isumaginnittumik aaqqissuusineq pinngitsuugassaannngitsutut aalajangersarneqassammat, soorlu aamma suliamik suliaqartumik ilinniarsimanissamik piumasaqaatinik aalajangersaasoqartoq.

Siusinnerusuukkut oqaluuserisanik 'Inuit ikiuinermi atassuteqarfimmik isumaginnittut'-nut assingusunik Inatsisartuni oqaluuserisassatut siunnersuuteqartoqartarsimavoq (UKA2020/54). Siunnersuutigineqartoq Inatsisartuni ilaasortanit taamanilu Naalakkersuisunit pitsaasumik tiguneqarpoq. Naalakkersuisut atuartunik nukittorsaaniarlutik kissaateqarnerat aamma ajornartorsiutinik qaangiiniarnermut atuartut naammaginatsumik atuarnermi angusaqarsinnaanerigaluannut ajornarsaarutaasunik qaangiinissamut ikiuunniarnerat ataatsimiititaliap tapersersuinnarsinnaavaa.

4.6 Atuarfinni pisortassanik ilinniartitsineq

Atorfinitsinneqarnertup ukiut pingasut qaangiutsinnagit atuarfimmi pisortatut ilinniagaqarnissamik periarfissiinissaq ataatsimiititaliap pitsaasutut isigaa. Atorfinitsitsiniarnermi ajornartorsiutaasinnaasunik eqaannerulersitsivoq. Inatsit atuuttoq naapertorlugu atuarfinni pisortanik ilinniartitsineq piumassuseq tunngavigalugu ingerlanneqartarpoq, tamannalu atuarfinni pisortanik piumassuseqartunit, piffissaqartunit nukissaqartunit illu ingerlanneqartarluni. Atuarfiup pisortaatut suliassaq isumagisinnaajumallugu pineqartoq atuarfimmi ilinniartitsisutut ilinniarnermik Naalakkersuisunit akuerineqartumik ilinniarnermik allamik naammassisaqarsimassaaq aamma kommunalbestyrelsit isumasioreerlugit Naalakkersuisunit aalajangersarneqartut malittarisassat naapertorlugit atuarfiup pisortaatut ilinniartitaanermik naammassisaqarsimassalluni.

Atuarfinnut pisortanut aalajangersakkap atuutilernera sioqqullugu atorfeqareersunut

allannguutip atuutinnginnera ataatsimiititaliap maluginiarpa. Aalajangersaq aatsaat 1. januar 2023-mi atuutilissamat tamanna sioqqullugu atorfinitsinneqarsimasunut atuuttuussanngilaq.

Atuarfiup pisortaanik ilinniartitaanermut tunngasunik nalunaarusiornikkut malittarisassiortoqassasoq Naalakkersuisut pisussaaffigigaat ataatsimiititaliamittaaq maluginiarneqarpoq. Soorlutaq aamma Naalakkersuisut kommunalbestyrelsenik atuarfinni pisortanik sulisitsisuusunik peqataatsiniarnerat allassimasoq. Taamatut suleqatigiitsinissamik aaqquissuussinerup pissarsiffigineqarnerusissaa ataatsimiititaliaq isumaqarpoq.

4.7 Naalakkersuisut allannguutissatut siunnersuutaat

Aappasaaneerinnginnermi allannguutissatut siunnersuummik Naalakkersuisut saqqummiussaqtut ataatsimiititaliamit maluginiarneqarpoq. Siunnersuutip kalaallisuuani iluarsiissutit erseqqissaanerillu allannguutissatut siunnersuummi kisimik pineqarmata ataatsimiititaliamit maluginiarneqarpoq.

5. Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai siunnersuummi nalinginnaasumik oqaaseqaatini allaaserineqarput.

Isumaginninnermik atassuteqarfissamik pilersitsinissaq pillugu allaqqavoq ”Atuarfinni taakkunani isumaginninnermik siunnersortimit atorfinitsitsinikkut ikiuinnermi atassuteqarfissamik pilersitsisoqassappat tamanna isumaginninnermut siunnersortimut ataatsimut 400.000 kr.-t missaannik akissarsianik kinguneqartitsissasoq imaluunniit pineqartup ilinniarsimanikkut tunuliaqutaa piginnaasaalu apeqqutaatillugit allatigut akissarsiatigut aningaasartuuteqartitsissasoq”


Atuarfiup pisortaanik aqutsisutut ilinniarneq kommuninut katillugu 576.000 kr-nik aningaasartuuteqarfiunerussasoq aningaasatigut kingunerisassaanut ilimagineqarpoq.

Maanna ilisimasat tunngavigalugit ataatsimiititaliaq allamik naliliissalluni pissutissaqarsorinngilaq. Ataatsimiititaliap taamaalilluni tatigaa Naalakkersuisut sukumiisumik misissuisimassasut tamassumalu kingunerisaanik aningaasatigut allatigut kinguneqartitsisoqarnissaa pisussatut isiginagu. Siunnersuutaasorli ilimagisamat akkerliisumik pisortanut aningaasartuuteqalernissamik kinguneqassagaluarpat, aningaasartuutit taakku aningaasaliissutinit pioreersunit matussuserneqassapput, tamassumalu kingunerisaanik pilersaarutaasunik allanik tulleriarinikkut allanngortitsisoqartariaqassalluni.

6. Ataatsimiititaliap inassuteqaataa

Naalakkersuisut allannguutissatut siunnersuutaat akuerineqassasoq ataatsimiititaliap isumaqatigiittup inassutigaa.

Taamatut oqaaseqarluni isumaliutissiisummilu allassimasutut paasinnillutik matumuuna siunnersuut ataatsimiititaliap aappasaaniigassanngortippaa.



Sofia Geisler
Siulittaasq



Doris Jakobsen Jensen
Siulittaasup tullia



Mariia Simonsen



Nivi Olsen



Mette Arge-Hammeken



Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliaq

Pillugit: Allakkatigut apeqquteqaatit UKA2021/134-mut Atuarfik pillugu Inatsisartut inatsisaata allangortinneqarnera pillugu Inatsisartut Inatsisissaannut siunnersuut

Asasakka Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliami ilaasortat.

15-10-2021
Sagsnr. 2020 - 21166
Akt nr. 18180010

Postboks 1029
3900 Nuuk
Tlf: +299 34 50 00
Email: ikin@nanoq.gl
www.nanoq.gl

Ataatsimiititaliap ulloq 11. oktober apeqquteqaatigisai qujassutigaaqka, ullormut oqaluuserisassani immikkoortup UKA 2021/134-p, Atuarfik pillugu Inatsisartut inatsisaata allangortinneqarnissaa pillugu siunnersuummik suliaqarnissinnut atatillugu saqqummiussasi.

Tulliuttuni qinersimavara apeqqutigineqartunik ataasiakkaarlugit tulleriarlugit isuaaneq, apeqqutigineqartullu kingornagut akissuteqarfigisarlugit.

Atuartut amerlassusissaat:

1. Siunissami qaninnermi Nalunaarummik suliaqartoqarnissaa naatsorsuutigineqarpa?

Akissut:

Piffissalersuinermit atatillugu apeqqutigineqartoq siunnersuummi pisinnaatitsissummik atuinissamut annerusutigut kommunalbestyrelsinik ingerlatsisunillu allanik oqaloqateqartarnernik tunngaveqarpoq, aqutsinikkut iliuusissat pisariaqartut eqqarsaatigalugit. Naalakkersuisut pissamaarput oqaloqatiginnittarnernik pineqartunik aallartitsinissamik, siunnersuutip naammassillugu suliarineqareerneratigut. Taamaattumillu maannangaaq periarfissaqanngilaq piffissalersuinissamut.

2. Aalajangersakkamut uunga tigussaasumik nalunaarut qanoq isikkoqarsinnaava?

Akissut:

Pisinnaatitsissutip oqaasertalerneqarnerani ersippoq atuartut amerlassusissaasa ikilineqarsinnaanerat tunngavilersorneqassasoq atuartut ilikkagaqarsinnaassusiannik atugarissaarnissaannillu. Tamatumunnga naapertuuttumik nalunaarut aalajangersakkanik atuartut amerlassusissaasa ikilineqarsinnaanerinik imaqaassaaq, immikkut pingaarutilinnik isiginiagassat ilikkagassatigut atuartitsinnermi pineqartillugit, tamatumani ilikkagaqartitsisinnaanermut periarfissat pitsaa-

suunerisigut, atuaqatigiit peqatigiinneranni avatangiisinilu pissutsit tamanna tullu-artippassuk. Tamatumunngalu atatillugu malittarisassani akulerunneqassapput apeqqutit naammattumik ilikkagaqartitsisinnaanermiittut, aamma atuartoqatigiit peqatigiinnerannik perrassaasut, tamatumalu kingunerisinnaavaa atuaqatigiit amerlanerpaaffissaqarnerisa killeqarnissaa.

Eqqaaneqartut allaffissornikkut maleruagassanik aalajangiisinaanerit assersuutigalugu atuartunik ikinnerulersitsineq klassip atuarfiusup angissusaanut naapertuuttumik. Pissutsit aamma pineqartut tassaasinnaapput perorsaanermut isiginiagassanik tunngaveqartunik takussutissaqartinneqarpat atuaqatigiit klassimi ikinnerunissaat iluaqutissartaqartoq. Aamma assersuutigalugu pineqarsinnaavoq atuaqatigiit qanoq katitsigaaneri, pissutissaqartitsisinnaasoq klassimi atuaqatigiit ikinnerunissaannut, tamatumani ilaatigut isiginiarneqartariaqarpat atuartut amerlasuut immikkut pisariaqartitsisuuneri.

3. Atuaqatigiiaat amerlassusaasa ikilinissaanut piumasaqaammut suut tunngaviusinnaanerit pillugu Naalakkersuisut qanoq nalilersuiniarpat?

Akissut:

Nalilersuineq aallaaveqassaaq apeqqutip 3-p akineqarnerani pissutsit suut atuutuunerinik. Tamanna pissaaq Naalakkersuisut suliassaqarfimmi nalinginnaasumik nakkutilliinerat tunuliaqutaralugu, tak. malittarisassat apeqqutip 16-ip akineranut tunngaviusut kiisalu kommuninik susassaqtutullu soqutigisaqartunik alanik oqaloqateqarneq.

- a. Kommunalbestyrelsit atuarfiilluunniit nammineerlutik Naalakkersuisunut pisariaqartitaminnik nalunaaruteqassappat? Imaluunniit Naalakkersuisut kisimiillutik aalajangiisuussappat?

Akissut:

Tunngaviussaaq apeqqummi pineqartut ersarinnerusumik suussusilerlugit qulaarneqarsimaneri, allaffissornikkut aalajangersakkanik malittarisassiornermi, tamannalu naatsorsuutigineqarpoq kommunit qanimut isumasiortarlugit pisartus-satut, soorluttaaq ataatsimut isigaluni tamanna aallaaviusoq qularnaarumallugit ataqatigiissaagaasunik sunniuteqarluartussanillu meeqqat atuarfiannut atatillugu unammilligassanik isiginninneq.

4. Atuaqatigiiaat amerlassusiisa ikilinnerisigut tamassumalu kingunerisaanik atuaqatigiiaanik amerlanerusunik pilersitsisoqartariaqalerpat, atuarfittut ilinniartitsisunik amerlanerusunik atorfinitsitsisariaqalissagaanni aningaasaliissutigineqartut amerlineqassappat?

Akissut:

Apeqqut attupillanneqartoq naatsorsuutigineqarpoq taamaattoqassappat nalinginnaasumik ilaatinneqassasoq pissusissamisoortumik kommuninik

isumaqatigiinniarnerni, allaffissornikkut malittarisassanik aqutsinermut atatillugu.

Oqaluttuarisaaneq namminerisamik atuartitsissutit:

5. Atuartitsinernut tiiminik agguataarisoqarnerani inuiaqatigiilerinermik, upperisiornermik eqqarsaqqissaarnermilu tulleriarinermi oqaluttuarisaanermik atuartitsinermut sanilliullugit kingullinngortinnginnissaat qanoq iliuseqarluni qulakkeerneqassava?

Akissut:

Inatsisiliornikkut akunnerit atuartitsiviusussat minnerpaaffissalernerqartarput atuartitsiviusuni alloriarnerni tamani. Kommunini oqartussaasut ilikkagassani atuartitsissutini ataasiakkaani immikkoortunilu akunnerit atuartitsiviusussat agguataartarpaat. Atuartitsissutini – fagini – tamani aamma ataatsimoortuni akunnerit atuartitsiviusussat aalajangersarneqartussaapput atuartitsineq naammassisaqarfiusinnaangorlugu atuartitsissutini ataasiakkaani ataatsimoortunilu ilikkagassat eqqarsaatigalugit. Tamanna aamma atuuppoq inuiaqatigiilerinermi, upperisalerinermi aamma isumalioqqissaarnermi kiisalu oqaluttuarisaanermi. Ilinniartitaanermut Aqutsisoqarfiup aallartereerpaa atuartitsissutissanut siunertanik ilikkagassanilu angusassanik ilinniartitsissutini suliassaqarfinnilu tamani atuuttussanik suli-aqarneq. Atuartitsissutini siunertat ilikkagassanilu anguniakkat maanna atuartitsissutini - fagini – inuiaqatigiilerinermilu, ullumikkut oqaluttuarisaanermik aamma ilaqartumi tunngaviusussat, taamaaliornikkullu atuartitsissutit fagit immikkoortiterneri ersarinnerulersillugit.

6. Ukiuni kingullerni marlunni atuarfiit ataasiakkaat inuiaqatigiilerinermi, upperisiornermi eqqarsaqqissaarnermilu atuartitsinernik qanoq tiiminik tulleriarippat?

Akissut:

Nuna tamakkerlugu 2020-imi agguaqatigiissillugu piffissaq atuartitsiviusartoq akunnernut 38,31 (atuartitsiviusut piffissat 51-it tamarmik 45 minutsit) ukiumut inuiaqatigiilerinermi aamma akunnerit 33,11 (tamarmik piffissat 44-t atuartitsiviusut immikkut tamarmik 45 minutsit) upperisalerinermi aamma isumalioqqissaarnermi klassini alloriarfiusuni tamani.

Nuna tamakkerlugu 2019-imi agguaqatigiissillugu akunnerni 39,45 atuartitsisoqarpoq (atuartitsiviusut piffissat 53-it tamarmik 45 minutsit) ukiumut inuiaqatigiilerinermi aamma akunnerit 32,15 (atuartitsiviusut piffissat 43-t tamarmik minutsini 45-ni) upperisiornermi aamma isumalioqqissaarnermi klassini alloriarfiusuni tamani.

Ataani naatsorsorlugit katiterneqarput kommunit ataatsimoortunik aammalu agguaqatigiissitsilluni akunnerit inuiaqatigiilerinermi aamma upperisalerinermi/ isumalioqqissaarnermi atortagaat. Taamaattoq naatsorsuutininik soqanngilaq fagit suliassaqarfiit akimorlugit ingerlatsisarnerit aamma sammisakkaartunik suliniutikkaartunillu suliat pillugit.

2020

Kommune	Avannaata	Kujalleq	Qeqertalik	Qeqqa	Sermersooq	Katillugit
Klassit amerl.	124	54	70	80	150	478
Inuiaqatigiilerineq	4987,37	1886	2541,95	3198,6	5697,15	18311,07
Upp./Ataatsi. ak.	4212,3	1826	2200,95	2911,95	4674,85	15826,05

Akunnerit/klasse

Inuiaqatigiilerineq	40,22	34,93	36,31	39,98	37,98	38,31
Upp./Ataatsi. ak.	33,97	33,81	31,44	36,40	31,17	33,11

2019

Kommune	Avannaa	Kujalleq	Qeqertalik	Qeqqa	Sermersooq	katillugit
Klassit	130	56	73	97	152	508
Inuiaqatigiilerineq	5554,1	1975	2700,6	3666,6	6143,51	20039,81
Upp./Ataatsimut	4552,25	1853	2330,65	2727,8	4866,56	16330,26

Akunnerit/klasse

Inuiaqatigiilerineq	42,72	35,27	36,99	37,80	40,42	39,45
Upp./Ataatsimut	35,02	33,09	31,93	28,12	32,02	32,15

Sumiiffinni qinigassat:

7. Mernguarnartulerinermi assigiinngitsuni tallimani atuartsinerit tamarmik immikkut ilinniartitsisoqarnissaat naatsorsuutigineqarpa?

Akissut:

Aap, ullumikkut aamma taamaappoq. Atuarfiit ilinniartitsisut piffissaq suliffigissaat agguataartarpaat ilikkagassalerinernut ataasiakkaanut, ilinniartitsisut piginaanerini aamma kissaataannik tunngaveqartunik.

8. § 12 imm. 3-mi aalajangersagaq nutaaq ima paasineqassava, tassa atuartsinerit sananeq, assassorneq, erinarsorneq, timersorneq isiginnaartitsinerlu ataatsimoorlutik akuleriisillugit ingerlanneqassasut?

Akissut:

Naamik, sammisassat aqqissuunneqarsinnaapput ilikkagassani - fagini – pikkorissarnertut aamma/ imaluunniit suliassaqarfiit assigiinngitsut akimorlugit ingerlat-sinertut, sammisat marluk amerlanerilluunniit ingerlallugit.

9. Oqariartaatsimik 'atuartsissutigisassat piumasaqaataasumik' si-unnersuummi § 12 imm. 3-mi atorineqartutut faginut pikkorissarnertut paasinnineq eqqortumik paasinninnerua.

Akissut:

Naamik, taaguut fagit pinngitsoorani ingerlanneqartussat isumaqarput ilikkagassami fagimi tassani atuartitsisoqassasoq ilikkagassatut anguniakkat ilanngullugit. Fagini pikkorissarneq isumaqarpoq atuartitsinermik aaqqissuussisoqarsinnaasoq immikkut sammisassani imaluunniit immikkoortuni pikkorissartitsinertut, assersuutigalugu atoqatigiittarnermut tunngasunik atuartitsissutininik, sakkulerinermik ilinniarnermik, oqaasilerinermik, nuutinik ilinniarnermik assigisaannillu.

10. Teknologiiimik paasinninnermut ilikkagassatut pilersaarutinik mallittarisassanilluunniit Naalakkersuisut suliaqassappat, taanna angajullerni atuartitsissutini qinigassatut toqqarneqarsinnaasutut siunnersuutip § 13 imm. 3-mi ilanngunneqarsimammat.

Akissut:

Aap, suliaassarlu taanna ilinniartitaanermut Aqutsisoqarfimmi aallartinneqareerpoq.

- a. Qinigassatut toqqarneqarsinnaasumi teknologiiimik paasinninnermi ilinniartitsisuusussat atuarfimmi ilinniartitsisut koderinermik ilinniartitsisinnaanissaat Naalakkersuisunit naatsorsuutigineqarpa?

Akissut:

Aap. Naalakkersuisut naatsorsuutigaat atuarfimmi ilinniartitsisoqassasoq fagimi qinigassami teknologiiimik paasinninneq pillugu atuartitsisartussanik angajullerni, tamatumani aamma kodenik suliaqarnermik. Ilinniartitaanermut Aqutsisoqarfiup maanna neqeroorutigisareerpai pikkorissarnernik ingerlatsinerit suliaqarfimmut tunngasut, soorluttaaq ilinniarfissuaq aamma kommunit ineriartortitsinernik suliniuteqartut taaguuteqartumik "Kivitsisa", tassanilu aamma teknologiiimik paasinninneq sammineqartarluni.

11. Malittuani sumiiffinni toqqagassanik nalunaarsuineq, siunnersuutigineqartumi aalajangersakkanut eqqortumik takutitsinerunersoq pillugu oqaaseqaateqaqqullugit Naalakkersuisut qinnuigineqarput.

Takussutissiaq 1: Atuartitsissutigisassat piumasaqaataasut, Akuleriisillugit ingerlatsinerit Qinigassatullu toqqarneqarsinnaasut trinikkaarlugit agguataarneri

Trinit	Atuartitsissutigisassat piumasaqaataasut (atuartitsissutini pikkorissarnerit)	Akuleriisillugit ingerlatsinerit:	Qinigassatut toqqarneqarsinnaasut
Nukarliit	- Timersorneq - Eqqumiitsuliorneq	Nipilersorneq aamma assassorneq ilusilersuinerlu	
Akulliit	- Eqqumiitsuliorneq - Timersorneq - Assassorneq ilusilersuinerlu - Nipilersorneq - Illumi suliassanik ilinniarneq	TAKUUK! Nipilersorneq, assassorneq ilusilersuinerlu (Atuartitsilluni pikkorissarnertut imaluunniit akuleriisillugit ingerlatsinertut)	
Angajulliit	- Timersorneq - illumi suliassanik ilinniarneq		- Eqqumiitsuliorneq - Assassorneq ilusilersuinerlu - Nipilersorneq - Teknologiiimik paasinninneq - Sumiiffinni qinigassat

Takussutissiaq 2: Mernguernartulerinermi atuartitsinerni atuartitsiffiusussat sammisassallu

Atuartitsiffiu sussat:	Mernguernartuleriffiit							
Atuartitsiffiu sussat:	Illumi suliassanik ilinniarneq	Nipilersorneq			Timersorneq	Eqqumiitsuliorneq	Assassorneq ilusilersuinerlu	
Sammisassat:		Erinarsorneq	Timersorneq	Isiginnaartitsineq	Aneerneq	Illuliortaaseq	Sana neq	Assassorneq

Akissut:

Aap, eqqortumik paasineqarpoq. Taamaattoq maluginiaqquneqarpoq fagit pinnigitsoorani ingerlanneqartussat pikkorissarnerinnartut ingerlanneqartannginneri. Tabelimut 2-mut atatillugu fagini sammisassat immikkut eqqaaneqarput malugeqqullugu taakkua sammisani ilaasussaani, assersuutigalugu illuliortaaseq eqqumiitsuliornermik sammisaqarnertut naatsorsuunneqartussa.

Teknologiimik paasinninneq:

12. IT, uunga ilaallutik teknologiimik paasinninneq, digitalikkut perorsarsimaneq aamma digitalimi pissusilersorneq ilikkagassatut piler-saarutinut tulluuttunut ilanngunneqarnissaat Naalakkersuisut qulakkeerniarpaat?

Akissut:

Aap, IT fagini tamani ilikkagassanut pilersaarutitut nutarterivigineqartuni ilaasaaq.

Isumaginninnermi attaveqaqatigiittarnermi aqqissuussineq:

13. Isumaginninnermi attaveqaqatigiittarnermik aqqissuussineq siunnersuutikkut matumuunakkut inatsisitigut tunngavissinneqarnissaata saniatigut, atuarfimmi kaammattuisoqartarnermik aqqissuussinermi maanna atuututit sutigut assigiinngissuteqarpa?

Akissut:

Kaammattuisoqartarnermik aqqissuussineq ukiuni pingasuni suliniutitut aqqissuussinerusimavoq taamanikkut Ilaqutariinnermut Inatsisinillu Atortitsinnermut Naalackersuisoqarfiusup 2012-imiit 2015-imut atunnerani. Atuarfiit periarfissaqarsimapput ingerlatsinissanut aamma sulisumik timelæreritut akissarsiaqartusamut akissarsiassanik qinnuteqarsinnaanermut. Ukiumi atuarfiusumi 2013/2014 atuarfiit sisamat aningaasaliissutinik qinnuteqarsimapput. Taamanikkut Naalackersuisoqarfiusumut anguniagaasimavoq aqqissuussineq tamakkiisumik atortuulissasoq tamakkiisumillu kommuniniit ukiumi atuarfiusumit 2015/2016-imiit aningaasalersoneqalissasoq. Atuarfinni arlaqartuni aqqissuussineq isumaginninnermut siunnersorteqarnermik taarserneqarsimavoq.

Siunnersuummi isumaginninnikkut isumaqatigiissuteqartarnermik aqqissuussineq tamakkiisumik atortuulissaaq, ingerlatsinermullu atasumik ilinniarsimasuunissamik piumasaqaateqarfiusalluni, soorluttaaq pisariaqartitsinernik periarfissanillu tunngavilinnik aqqissuunneqartassasoq.

14. Upernaami 2014-imi kaammattuisoqartarnermik aqqissuussineq nalilersoneqartussaasimavoq. Nalilersuineq ataatsimiititaliap tigussallugu kisaatigaa.

Akissut:

Meeqqanut, Inuusuttunut Ilaqutariinnullu Naalackersuisoqarfiup ilisimatitsissutigaa aqqissuussineq ataatsimoortumik nalilersuivigineqarsimanngitsoq, nalilersuisarnissaq atuarfinnermut pineqartunut isumagisassannngortinneqarnikummat. Iltigisaanillu ilisimatitsissutigineqarsinnaavoq taamanikkut Naalackersuisuusut 2014-ip upernaavani aalajangermata atuarfinni kaammattuisoqartarnermik aqqissuussineq matuneqassasoq, aningaasaliissutaasullu sinneri nuunneqassasut kontumit 30.14.29 Isumaginninnermi suliniutit, ingerlatsinernut meeqqanik siunnerfeqartunut kr. 1.040.000 kontumit 30.10.45 Meeqqat inuusuttullu immikkut ittunik suliniuteqarfignerat, meeqqanut tunngasunik sulianik nukittorsaanertut.

15. Isumaginninnermi attaveqaqatigiittarnermik aqqissuussineq ukiuni arlalinni atoreerneratigut nalilersoneqassasoq Naalackersuisut naatsorsuutigaa?

Akissut:

Aallarniutigalugu nalunaarutigineqassaaq Naalakkersuisut pissusissamisoortut nalilermassuk inatsisiliornikkut nutaaliernerit akuersissutigineqarnerinut ilaliullugu nalilersuisoqassasoq taakkua qanoq tigussaanagerusumik atortinneqarnissaat. Tamanna nalinginnaasumik pissasoq naatsorsuutigineqarpoq aaqqissuussinerit pineqartut ukiualunni atuutereerneranni.

Taamaattumillu aamma pissusissamisoortut nalilerneqarpoq nalilersuinerik suliaqartoqassasoq isumaginninnikkut attaveqatigiinnikkut aaqqissuussinerik, aaqqissuussinerit atortuulerneranniit ukiualunnguit qaangiunneranni.

Nalilersuinerik pineqartumik ingerlatsineq kommunit suleqatigalugit ingerlaneqaruni iluaqutissartaqassaaq.

- a. Taamaassappat qaqugu tamanna pissasoq naatsorsuutigineqarpoq?

Akissut:

Innersuussisoqassaaq apeqqutip 15-ip akineqarneranut.

16. Kommunalbestyrelsit inatsimmi piumasaqaataasunik naamassinninnerat Naalakkersuisunit qanoq iliorluni nakkutiginiarneqarpoq?

Akissut:

Aallarniutigalugu oqaatigineqassaaq oqaloqatigiittarnermik tunngaveqartumik nakkutilliineq pineqarmat, kommunit suliassa qarfirmut atatillugu isiginiagaannik tunngaveqartoq, tamannalu annerusutigut paasissutissanik katersinissamut periarfissaqarfiusuni pisluni. Tamanna isiginiarneqassaaq tunngavigalugu matumani pineqarmat kommunit suliassaq akisussaaffigisaat, Namminersorlutik Oqartussat nalinginnaasumik ilitersuivigisanngisaat. Aammattaaq atuarfik pilugu inatsimmi § 37, imm. 2-mi ersippoq Naalakkersuisut kommunalbestyrelsinut paasissutissanik piumasaqarsinnaasut, tamanna Inatsisartut inatsisaani suliassanik isumaginninnermut pisariaqartutut isigineqaraangat.

Naalakkersuisut nakkutilliinerat kommunit inatsisinik eqqortitsisarnerannik tigussaasumik pisarpoq kommunalbestyrelsinut paasissutissanik piniartarnikkut, pisutsini aalajangersimasunik ajornartorsiuteqarfiusutut isigineqartartuni, qitiusumik oqartussaniit nammineq maluginiarneqartunik imaluunniit atuisuniit allani luunniit immikkut ajornartorsiutit tikkuarneqarsimasunik. Kiisalu nakkutilliineq pisarpoq paasissutissanik kisitsisinillu katersinikkut, matumani aamma eqqaaneqartutut 1. oktober nalunaarusiatigut, alloriarnerni misillitsinnerni angusatigut misillitsinnernilu angusatigut. Oqaloqatigiittarluni nakkutilliineq isigineqassaaq inatsisiliornikkut Naalakkersuisut immikkut sakkussineneqarsimannginnerannik kommunalbestyrelsit pisussaaffinut akulerussinnaanissamut.

Oqaloqatigiittarneq sakkugalugu nakkutilliinerup ilaatut Ilinniartitaanermut Aqutsisoqarfik ingerlaavartumik kommunini atuarfeqarnermut ingerlatsivinnik oqaloqateqartarpoq, ukiup ingerlanerani arlaleriarluni oqarasuaatikkut ataatsimiittarnertigut, kiisalu tikilluni ataasiakkaatigut oqaloqatigiittarnertigut, taakkunanilu aamma inatsisinut tunngasunik apeqqutinik samminittoqartarluni. Tamatumalu saniatigut apeqqutit perorsaanermt inatsisinullu attuumassuteqartut oqallisigineqartarput ukiumoortunik atuarfinni pisortat ataatsimiittarnerini aammalu Ilinniarnermik Instituttip Ilinniartitaanermullu Aqutsisoqarfiup pikkorissaasarnerini, assersuutigalugu inatsisiliornikkut suliniutit saqqummiunneqarfigisagaannik itisuumillu oqallisigineqarfigisagaannik. Kiisalu ingerlaavartumik Ilinniartitaanermut Aqutsisoqarfik attavigineqartarpoq assersuutigalugu ingerlatsivinniit, atuarfinni pisortaniit, ilinniartitsisuniit, atuarfinni siulersuisunut ilaasortaniit, angajoqqaaniit il.il., nalornissuteqartoqarsimatillugu inatsisit assigiinngitsut isumaqatigiissutillu qanoq paasineqarnissaannik atorneqarnissaannillu. Taamaasillunilu oqartoqarsinnaavoq oqaloqatigiittarnernik tunngaveqartunik nakkutilliineq kommunit Inatsisartut inatsisiliaannik atuinerat pillugu aamma ilaqarmat siunnersuisarnernik ilitsersuisarnernillu, qanoq inatsisit paasineqarnissaat atortinneqarnissaallu pillugit.

Eqikkaallunilu taamaasilluni oqaatigineqarsinnaavoq Naalakkersuisut pingaarnertut nakkutilliinerat ullumikkut ingammik imatut aaqjissuunneqartartoq:

- Kommunalbestyrelsit paasissutissanik piumaffigisarnersigut pissutsini ajornartorsiutinut aalajangersimasunut atatillugu pisariaqartitsiviusuinut,
- Kommunalbestyrelsinut ukiumoortunik kisitsisinik paasissutissanik piumasaqartarnikkut atuarfimmi pissutsinut tunngatillugu, matumani misilitsinnernut, misiliinernut ukiumoortunillu karakteriliisarnernut,
- Ingerlaavartumik oqaloqatigiittarnikkut ataatsimiinnertigut, pikkorissarnertigut, siunnersuinertigut, ilitsersuisarnertigut assigisaasigullu.

Inussiarnersumik inuulluaqqusilluta


Peter Olsen